

Prof. Emeritus Dato' Dr Hassan Said

NAIB CANSELOR
VICE CHANCELLORUniversiti Teknologi MARA
Aras 6, Canseleri Tuanku Syed Sirajuddin
40450 Shah Alam, Selangor Darul Ehsan, MALAYSIA
Tel: +603-5544 2001/2222
Faks: +603-5544 2030/2223
E-mel: hassan@salam.uitm.edu.myUNIVERSITI
TEKNOLOGI
MARARujukan Kami : 100-UInt.6/2
Tarikh : 2 NOV 2016**SEPERTI EDARAN**

YBhg. Datuk/Datin Paduka/Prof/Tuan/Puan

KEWAJIPAN UNTUK MEMBUAT PELAPORAN JIKA TERDAPAT UNSUR PENYOGOKAN

Dengan segala hormatnya perkara di atas adalah dirujuk.

2. Dimaklumkan YBhg. Datuk/Datin Paduka/Prof/Tuan/Puan selaku Ketua Jabatan kepada Pusat Tanggungjawab adalah dikehendaki untuk memaklumkan kepada syarikat yang membuat pembekalan barang atau perkhidmatan kepada Jabatan/Bahagian/Pusat/Unit/Fakulti/Kampus masing-masing berkenaan kewajipan untuk membuat pelaporan kepada Unit Integriti ataupun pihak Suruhanjaya Pencegahan Rasuah Malaysia jika terdapat staf universiti yang cuba atau telah memohon suapan daripada mereka.

3. Untuk makluman di bawah Seksyen 25, Akta Suruhanjaya Pencegahan Rasuah Malaysia (ASPRM) 2009 telah dinyatakan seperti berikut:

i. Seksyen 25(3): menyatakan mana-mana orang yang daripadanya suapan telah diminta atau diperoleh atau percubaan dibuat untuk memperoleh suapan hendaklah seawal mungkin melaporkan perkara tersebut. Kegagalan mematuhi seksyen ini merupakan satu kesalahan dibawah seksyen 25(4) Akta yang sama dan jika disabitkan boleh **didenda** tidak melebihi RM10,000 atau **penjara** tidak melebihi 2 tahun atau kedua-duanya.

4. Maksud suapan adalah terdiri daripada wang, hadiah, harta, bonus, diskau, komisen, jawatan, kontrak pekerjaan, perkhidmatan dan lain-lain tafsiran di bawah Seksyen 3, Akta SPRM. Untuk makluman pihak pengurusan mengambil berat isu staf UiTM yang cuba atau telah meminta suapan daripada syarikat yang membekalkan barang atau perkhidmatan kepada universiti.

5. Perhatian dan kerjasama pihak YBhg. Datuk/Datin Paduka/Prof/Tuan/Puan dalam memaklumkan kepada pihak syarikat berkenaan didahului dengan ucapan terima kasih.

Sekian.

Yang benar

PROFESOR EMERITUS DATO' DR HASSAN SAID
Naib Canselor

s.k Bendahari Universiti Teknologi MARA



UNIVERSITI TEKNOLOGI MARA

PEKELILING NAIB CANSELOR

Bilangan 06 Tahun 2016

KEWAJIPAN UNTUK MELAPORKAN TRANSAKSI PENYOGOKAN

TUJUAN

1. Pekeling ini bertujuan untuk memaklumkan mengenai kewajipan staf Universiti Teknologi MARA untuk membuat pelaporan transaksi penyogokan.

LATAR BELAKANG

2. Akta Suruhanjaya Pencegahan Rasuah Malaysia (ASPRM) 2009 digubal bertujuan menggalakan integriti dan kebertanggungjawaban pentadbiran sektor awam tentang rasuah dan kesan buruknya terhadap pentadbiran sektor awam, swasta dan komuniti.

3. Telah dinyatakan di bawah Seksyen 25 Akta SPRM 2009 mengenai kewajipan untuk melaporkan transaksi penyogokan seperti berikut:

- 3.1 Seksyen 25(1): menyatakan bahawa mana-mana orang yang diberi, dijanjikan atau ditawarkan apa-apa suapan dengan melanggar peruntukan Akta tersebut hendaklah melaporkan pemberian, janji atau tawaran itu. Kegagalan mematuhi seksyen ini merupakan satu kesalahan dibawah seksyen 25(2) Akta yang sama dan jika disabitkan kesalahan boleh didenda tidak melebihi RM100,000 atau penjara tidak melebihi 10 tahun atau kedua-duanya.

- 3.2 Seksyen 25(3): menyatakan mana-mana orang yang daripadanya suapan telah diminta atau diperoleh atau percubaan dibuat untuk memperoleh suapan hendaklah seawal mungkin melaporkan perkara tersebut. Kegagalan mematuhi seksyen ini merupakan satu kesalahan dibawah seksyen 25(4) Akta yang sama dan jika disabitkan boleh **didenda** tidak melebihi RM10,000 atau **penjara** tidak melebihi 2 tahun atau kedua-duanya.

(Petikan Seksyen 25 Akta SPRM dilampiran)

4. Maksud suapan di bawah Akta SPRM 2009 adalah terdiri daripada wang, hadiah, harta, bonus, diskaun, komisen, jawatan, kontrak pekerjaan, perkhidmatan dan lain-lain tafsiran di bawah Seksyen 3 Akta Suruhanjaya Pencegahan Rasuah Malaysia 2009.

(Petikan Seksyen 3 Akta SPRM dilampiran)

5. Kesalahan rasuah di bawah Akta SPRM 2009 adalah seperti berikut:

- 5.1 Seksyen 16(a) - mana-mana orang secara rasuah meminta atau menerima atau bersetuju menerima bagi dirinya atau bagi mana-mana orang lain apa-apa suapan.
- 5.2 Seksyen 16(b) - mana-mana orang secara rasuah memberikan, menjanjikan atau menawarkan kepada mana-mana orang apa-apa suapan
- 5.3 Seksyen 17(a) - sebagai seorang ejen secara rasuah menerima atau memperoleh apa-apa suapan
- 5.4 Seksyen 17(b) – memberikan atau menawarkan suapan kepada mana-mana ejen
- 5.5 Seksyen 18 – mengemukakan apa-apa resit, akaun atau dokumen yang mengandungi pernyataan palsu

5.6 Seksyen 23(1) - pegawai badan awam menggunakan jawatan atau kedudukannya untuk apa-apa suapan

(Petikan Seksyen 16, 17, 18 dan 23 Akta SPRM dilampiran)

PELAKSANAAN

6. Semua staf Universiti Teknologi MARA dikehendaki melaporkan kepada pihak Unit Integriti Universiti Teknologi MARA ataupun kepada pihak Suruhanjaya Pencegahan Rasuah Malaysia jika terdapat aduan berkenaan jenayah rasuah yang berlaku di Jabatan/Bahagian/Pusat/Unit/Fakulti/Kampus.

TINDAKAN TATATERTIB

7. Prosiding tata tertib juga boleh dimulakan kepada staf yang didapati gagal melaporkan salah laku rasuah yang dibawah pengetahuan mereka dan boleh dikategorikan sebagai tidak bertanggungjawab di bawah Akta Badan-Badan Berkanun (Tatatertib dan Surcaj) 2000 (Akta 605).

TARIKH DIKELUARKAN

8. Pekeliling ini dikeluarkan pada 1 November 2016

TARIKH KUATKUASA

9. Pekeliling ini berkuat kuasa 1 November 2016

PEMAKAIAN

13. Pekeliling ini adalah terpakai untuk seluruh sistem Universiti Teknologi MARA.




PROFESOR EMERITUS DATO' DR HASSAN SAID
Naib Canselor

Dikelilingkan Kepada:

*Semua Timbalan Naib Canselor
Semua Ketua Jabatan/Bahagian/Pusat/Unit
Semua Dekan-Dekan Fakulti
Semua Rektor-Rektor Kampus Negeri*

*Bil. Fail : 100-UIInt(6/7/1)
No Siri : 100-UiTm(NC 6/2)*



UNDANG-UNDANG MALAYSIA

Akta 694

**AKTA SURUHANJAYA PENCEGAHAN RASUAH
MALAYSIA 2009**

mengawal, atau syer yang nilainya berjumlah tidak kurang daripada tiga puluh peratus daripada modal terbitan keseluruhan perbadanan itu; atau

- (e) pemegang amanah mana-mana amanah, jika—
- (i) amanah itu telah diwujudkan oleh orang itu; atau
 - (ii) nilai keseluruhan aset yang disumbangkan oleh orang itu kepada amanah itu pada bila-bila masa, sama ada sebelum atau selepas amanah itu diwujudkan, berjumlah, pada bila-bila masa, tidak kurang daripada dua puluh peratus daripada keseluruhan nilai aset amanah itu;

“suapan” ertinya—

- (a) wang, derma, alang, pinjaman, fi, hadiah, cagaran berharga, harta atau kepentingan mengenai harta, iaitu apa-apa jenis harta, sama ada alih atau tak alih, faedah kewangan, atau apa-apa manfaat seumpama itu yang lain;
- (b) apa-apa jawatan, kebesaran, pekerjaan, kontrak pekerjaan atau perkhidmatan, dan apa-apa perjanjian untuk memberikan pekerjaan atau memberikan perkhidmatan atas apa-apa sifat;
- (c) apa-apa bayaran, pelepasan, penunaian atau penyelesaian apa-apa pinjaman, obligasi atau liabiliti lain, sama ada keseluruhannya atau sebahagian daripadanya;
- (d) apa-apa jenis balasan berharga, apa-apa diskaut, komisen, rebat, bonus, potongan atau peratusan;
- (e) apa-apa perbuatan menahan diri daripada menuntut apa-apa wang atau nilai wang atau benda berharga;
- (f) apa-apa jenis perkhidmatan atau pertolongan lain, termasuk perlindungan daripada apa-apa penalti atau ketidakupayaan yang dikenakan atau yang dikhuatiri atau daripada apa-apa tindakan atau prosiding yang bersifat tatatertib, sivil atau jenayah, sama ada atau tidak sudah dimulakan, dan termasuk penggunaan atau menahan diri daripada menggunakan apa-apa hak atau apa-apa kuasa atau kewajipan rasmi; dan
- (g) apa-apa tawaran, aku janji atau janji, sama ada bersyarat atau tidak bersyarat, untuk memberikan suapan mengikut pengertian mana-mana perenggan (a) hingga (f);

- (b) untuk mengenal pasti apa-apa kelemahan dalam tatacara kerja Suruhanjaya yang mungkin menimbulkan aduan dan jika difikirkannya sesuai untuk membuat apa-apa syor tentang tatacara kerja Suruhanjaya sebagaimana yang difikirkannya patut.
- (2) Menteri boleh melantik tidak lebih daripada lima orang, yang difikirkannya patut dan sesuai, untuk menjadi anggota Jawatankuasa Aduan.

BAHAGIAN IV

KESALAHAN DAN PENALTI

Kesalahan menerima suapan

16. Mana-mana orang yang sendiri atau melalui atau bersama dengan mana-mana orang lain—

- (a) secara rasuah meminta atau menerima atau bersetuju untuk menerima bagi dirinya atau bagi mana-mana orang lain; atau
- (b) secara rasuah memberikan, menjanjikan atau menawarkan kepada mana-mana orang sama ada bagi faedah orang itu atau bagi faedah orang lain,

apa-apa suapan sebagai dorongan untuk atau upah bagi, atau selainnya oleh sebab—

- (A) mana-mana orang melakukan atau tidak melakukan apa-apa jua berkenaan dengan apa-apa perkara atau transaksi, sama ada yang sebenar atau yang dicadangkan atau yang mungkin berlaku; atau
- (B) mana-mana pegawai sesuatu badan awam melakukan atau tidak melakukan apa-apa jua berkenaan dengan apa-apa perkara atau transaksi, sama ada yang sebenar atau yang dicadangkan atau yang mungkin berlaku, yang dengannya badan awam itu terlibat,

melakukan suatu kesalahan.

Kesalahan menggunakan jawatan atau kedudukan untuk suapan

23. (1) Mana-mana pegawai badan awam yang menggunakan jawatan atau kedudukannya untuk apa-apa suapan, sama ada bagi dirinya sendiri, saudaranya atau sekutunya, melakukan suatu kesalahan.

(2) Bagi maksud subseksyen (1), seseorang pegawai badan awam hendaklah dianggap, sehingga akasnya dibuktikan, telah menggunakan jawatan atau kedudukannya untuk apa-apa suapan, sama ada bagi dirinya sendiri, saudaranya atau sekutunya, apabila dia membuat apa-apa keputusan, atau mengambil apa-apa tindakan, berhubungan dengan apa-apa perkara yang mengenainya pegawai itu, atau mana-mana saudara atau sekutunya, mempunyai kepentingan, sama ada secara langsung atau tidak langsung.

(3) Bagi mengelakkan keraguan, adalah diisyiharkan bahawa, bagi maksud subseksyen (1), mana-mana anggota pentadbiran sesuatu Negeri hendaklah disifatkan telah menggunakan jawatan atau kedudukannya untuk suapan jika dia bertindak bertentangan dengan subseksyen 2(8) Jadual Kelapan kepada Perlembagaan Persekutuan atau peruntukan yang bersamaan dalam Perlembagaan atau Undang-Undang Tubuh Negeri itu.

(4) Seksyen ini tidaklah terpakai bagi seseorang pegawai yang memegang jawatan dalam sesuatu badan awam sebagai wakil suatu badan awam lain yang mempunyai kawalan atau kawalan separa atas badan awam yang mula-mula disebut itu berkenaan dengan apa-apa perkara atau benda yang dilakukan atas sifatnya sebagai wakil sedemikian bagi kepentingan atau faedah badan awam yang satu lagi itu.

Penalti bagi kesalahan di bawah seksyen 16, 17, 18, 20, 21, 22 dan 23

24. (1) Mana-mana orang yang melakukan kesalahan di bawah seksyen 16, 17, 20, 21, 22 dan 23 apabila disabitkan boleh—

- (a) dipenjarakan selama tempoh tidak melebihi dua puluh tahun; dan
- (b) didenda tidak kurang daripada lima kali ganda jumlah atau nilai suapan yang menjadi hal perkara kesalahan

Kesalahan memberi atau menerima suapan oleh ejen

17. Seseorang melakukan kesalahan jika—

- (a) sebagai seorang ejen, dia secara rasuah menyetuju terima atau memperoleh, atau bersetuju untuk menyetuju terima atau cuba untuk memperoleh, daripada mana-mana orang, untuk dirinya sendiri atau untuk mana-mana orang lain, apa-apa suapan sebagai suatu dorongan atau upah bagi melakukan atau tidak melakukan, atau kerana telah melakukan atau tidak melakukan, apa-apa perbuatan berhubungan dengan hal ehwal atau perniagaan prinsipalnya, atau kerana memberikan atau tidak memberikan sokongan atau tentangan kepada mana-mana orang berhubungan dengan hal ehwal atau perniagaan prinsipalnya; atau
- (b) dia memberikan atau bersetuju untuk memberikan atau menawarkan apa-apa suapan kepada mana-mana ejen sebagai dorongan atau upah bagi melakukan atau tidak melakukan, atau kerana telah melakukan atau tidak melakukan apa-apa perbuatan berhubungan dengan hal ehwal atau perniagaan prinsipalnya, atau bagi memberikan atau tidak memberikan sokongan atau tentangan kepada mana-mana orang berhubungan dengan hal ehwal atau perniagaan prinsipalnya.

Kesalahan dengan maksud untuk memperdayakan prinsipal oleh ejen

18. Seseorang melakukan kesalahan jika dia memberi seseorang ejen, atau sebagai seorang ejen dia menggunakan, dengan niat hendak memperdayakan prinsipalnya, apa-apa resit, akaun atau dokumen lain yang berkenaan dengannya prinsipal itu mempunyai kepentingan, dan yang dia mempunyai sebab untuk mempercayai mengandungi apa-apa pernyataan yang palsu atau silap atau tidak lengkap tentang apa-apa butir matan, dan yang dimaksudkan untuk mengelirukan prinsipalnya.

Penerima atau pemberi suapan melakukan suatu kesalahan tanpa mengambil kira maksud tidak dilaksanakan atau perkara tidak berkaitan dengan hal ehwal atau perniagaan prinsipal

19. (1) Jika dalam mana-mana prosiding terhadap mana-mana ejen bagi apa-apa kesalahan di bawah perenggan 17(a) adalah

itu jika suapan itu dapat dinilai atau berbentuk wang, atau sepuluh ribu ringgit, mengikut mana-mana yang lebih tinggi.

(2) Mana-mana orang yang melakukan kesalahan di bawah seksyen 18 apabila disabitkan boleh—

- (a) dipenjarakan selama tempoh tidak melebihi dua puluh tahun; dan
- (b) didenda tidak kurang daripada lima kali ganda jumlah atau nilai butir matan yang palsu atau silap itu jika butir matan yang palsu atau silap itu dapat dinilai atau berbentuk wang, atau sepuluh ribu ringgit, mengikut mana-mana yang lebih tinggi.

Kewajipan untuk melaporkan transaksi penyogokan

25. (1) Mana-mana orang yang diberi, dijanjikan, atau ditawarkan, apa-apa suapan dengan melanggar mana-mana peruntukan Akta ini hendaklah melaporkan pemberian, janji atau tawaran itu, berserta dengan nama, jika diketahui, orang yang memberikan, menjanjikan atau menawarkan suapan itu kepadanya kepada pegawai Suruhanjaya atau pegawai polis yang paling hampir.

(2) Mana-mana orang yang tidak mematuhi subseksyen (1) melakukan suatu kesalahan dan apabila disabitkan boleh didenda tidak melebihi satu ratus ribu ringgit atau dipenjarakan selama tempoh tidak melebihi sepuluh tahun atau kedua-duanya.

(3) Mana-mana orang yang daripadanya suapan telah diminta atau diperoleh, atau suatu percubaan telah dibuat untuk memperoleh suapan itu, dengan melanggar mana-mana peruntukan Akta ini, hendaklah seawal yang mungkin selepas itu melaporkan permintaan atau perolehan, atau percubaan untuk memperoleh, suapan itu berserta dengan perihalan yang lengkap dan benar dan, jika diketahui, nama orang yang meminta, atau memperoleh, atau cuba memperoleh, suapan daripadanya itu kepada pegawai Suruhanjaya atau pegawai polis yang paling hampir.

(4) Mana-mana orang yang tidak, tanpa alasan yang munasabah, mematuhi subseksyen (3) melakukan suatu kesalahan dan apabila disabitkan boleh didenda tidak melebihi sepuluh ribu ringgit atau dipenjarakan selama tempoh tidak melebihi dua tahun atau kedua-duanya.